

neho mladzenca, naše towarstwo horliweho sobustawa, naše Serbowstwo wobdarjeneho a džělaweho narodowca. Have pia anima!

Předsydstwo M. S. dokonja zrudnu přislušnosć z tym, zo palmowu hałzu ze serbskim napismom na jeho kašć položi a zo někotre jejne sobustawy jeho zemřete ćělo na Tuchořske pohrjebnišćo přewodźachu.

Michał Hórnik.

### Jurij Nowak,

administrator w Radworju.

\* 23. hapryla 1853. † 13. měřca 1887.

Jara zrudna powěsć roznjese so w katholskej serbskej stronje, hdyž tam před někotrymi dnjemi přičahnywši nowomjenowany farski administrator Jurij Nowak přećiwo wšomu wočakowanju zemře. Tež wón njebě jenož za swoju wosadu žiwy a starosćiwy, ale skutkowaše za zbože cyłego Serbowstwa po svojich mocach, po svojim powołanju a w svojich wobstojnosćach. Hdyž běchu tři serbscy duchowni w měsće Kulowje za sobu wotemřeli a tuta wulka wosada, do Wrótšlawja jako jenička serbska słušaca, w času „kulturkampfa“ noweho fararja z cyła dostać njemóžeše a wjele mjenje serbskeho, poda so tam wón z lubosće k serbskej wosadze po přeću budyšskeho ordinariata před swjatkami 1884 jako pomocny a požčeny duchowny abo kapłan na njewěsty přichod swojeje promocije a na wěste přejara napinace džělo. Nimale tři lěta horliwje tam skutkowaše za Serbow a tež za Němcow, kotřiž jenož džěl měščanskich wobydlerjow tworja, mjez tym zo je 12 cyle serbskich wsow zafarowanych. Dokelž bě we wosadze lubowany a tež pola Němcow w swojej džělawosći připóznaty, měješe po wotwobroćenju „kulturkampfa“ wot lońšeho nadziju na faru. Tola tu prócowachu so někotři němscy chauvinisći pola swětneje a duchowneje wyšnosće we Wrótšlawju, zo by tam farař přišoł, kotryž by wulkej wjetšinje wosady njedosahacy był, dokelž móže jenož jeničku němsku řeč. Pola krajneho radcy njeboćičkeho jako njepřećela Němcow wobskoržichu, dokelž bě Serbow k dobrowólnym přinoškam za serbskeho, na wučerstwo so prihotowaceho wosadneho mladzenca namołwjał! Tuž bě njewěste, hač zechce jeho swětna wyšnosć na farskim měsće, za kotrež bě pola kolla-